

De pai ont de vlaig

S ist an to van langes, en a zait as nea'met mear denkt, as en an òltn pèrg, hòt s a pai as vludert van an ploa'm af en ònder, finz za vòlln drau af a lutter. Der ploa'm ist puckt ano, asou as de pai mias gea' za schaug bo as ist s tirl za gea' aninn.

Òlls en an kolpo kimmpt der bint, de pai vinnt se vour de tir vare lutter, ont de vòllt aninn en ploa'm! S pariart laischiar a haisl! Gònz sturne, bavai de hòt hòrt tu' za schlong de vlung, hòt se se pfuntn en a grosa kickera drinn en a bòrma milch. De pai ist runt vroa bavai de milch ist guat ont sias, ober de ist runt bea'ne.

Garift za trinken de milch, nèt vèrr vare kickera hòt s af en tisch aa a hòlzschiisl pet drinn ra'm garo aro trim. En de mitt hòt s an schbòrzn punkt as umenònder geat, gònz kuglet ont pet glosvòrbega vlung; s ist an ònders vi: a vlaig.

Òlbe glaimer, òlb glaimer de pai vinnt se en de hòlzschiisl pet de vlaig ont òlla peada trinken se de milch, de schaug se u', ont de vrong se va bou sa kemmen. Oa'na vare Merika ont de ònder vare Afrika; de tschbinnen as òlla peada hom se a lònga roas gamòcht. De sai' bolten ònderst, oa'na pet groasa a'ng, vaina tschòttn, an schbòrzn laib ont glosvòrbega vlung. De ònder pet gela ont schbòrza rain as en laib ont zintrest an groasn ongl. Asou ònderst ober en glaiche plòtz, en glaiche moment. De vlaig ist a bea'ne derschrocken bavai der spitz va de pai stopft ont mòcht a bea'ne de vorch, ober de sèll pai pariart nèt asou znicht.

Òlla peada hom se se tsbunnen za gea' anaus vare lutter, durch s loch van kloa' batedèll ont gea' va ploa'm en ploa'm. De sai'runt vroa za vludern òlla peada zòmm, ober peada, aa bes de kemmen va òndra lender bissn sa as no a prenneta sunn kimp a bètter.

S tòndert ont s plitzt, òlla peada vludern se anau ont ano, gahasse, finz za vinnen a kloa's dachl van an òlta rint en bòlt, asou za stea' untn, a'ne darnetzen se. De hom derbail kontart van sai' lem, oa'n ist glickleger gaben ont der ònder minder. De vlaig ist gahairetet gaben, de pai nèt, de ist galep pet sai'na priader. De hom galòcht ont spillt

ver a bail. Bes baret nèt ver de vòrb ont ver en laib hattn sa pariart pruader ont schbester.

No a stunn hòt s better augaheart, as de sunn ist bider arauskemmen. Asou de pai ont de vlaig sai' bider gòngen za vludern af de luttern glaim kan pèrg. Nomitto hom se se bider pakemmp af an stoa' za ròsten.

De pai ist gaben gònz zittret ont hòt en kontart en de vlaig as de hòt probiart za gea' as a schnea'plea'mbl ober de ist arauspfòlln pet an groasn beata en kopf . De vlaig hòt se derschrocken ont de ist gòngen kan sai' voter za vrong bos as mechet sai' passiart.

Sai' voter, as ist gaben runt òlt ont as hòt s en bolten probiart en sai' lem, hòt en tsòk as an ettla plea'mbler sai' gifte ont hòt en tsòk za gea' lai a toal plea'mbler, abia de sklòppern, de luttern, de schmèckeler, de popn ont de edlbaisn.

Asou, to ver to, de pai ont de vlaig, sai' gòngen af de dòin plea'mbler as der vòter hòt en derklort. Ober an to hòt s tschauert ont ver za kriang nèt de grandler as en kopf hom se se versteckt drinn en an groasen ont èckstregen ploa'm.

Drinn as se sai' gaben, de pai hòt gahuastet, bavai en gònze ploa'm ist voll va rach gaben. De pai no a zaitl ist niderpfòlln en de tiaveste sait van ploa'm ont ist derschbòcht. Ober drinn en sèll rach de vlaig hòt schea' tsechen, hòt derbischt de pai ont pet de gònze sai' kròft hòt se sa gabellt araus ziachen. Ober der sèll ploa'm ist birkle groas gaben ont nèt laicht za tea' au. Alura hòt se u'pfònk za schrain.

Nemmen en ploa'm ist verpai an heischrèck as hòt baiter zouchen, bavai der hòt gahòp za tròng za èssn en sai' na kloa'na heischrèckler. De vlaig hòt bider tschrin.

Va verr ist kemmen a vlitlerl as hòt en pfrok en de vlaig bos as passiart ist, ober benn as de hòt gaheart as drinn en ploa'm hòt s a pai, ist se baiter gòngen a'ne hèlven.

De vlaig ist mia gaben za ziachen araus de pai ober de hòt en gabèllt gem a hònt.

Nou a vòrt ist verpai a gatschapreatl, pet en sai' laib roat ont de pinktler as de vlung. S ist birkle hungere gaben bavai òlla de paing


hom ganòmmen gahòp der nektar van plea'mbler. Benn as de hòt gaheart as drinn en sèll ploa'm ist gaben de pai ont de vlaig, ist se nemmen en ploa'm gòngen za schaung za hèlven en de zboa vicher. Ober glaim as de ist gaben hòt se tschoum der stil, asou de pai ont de vlaig sai' garutscht en de tiaveste sait van ploa'm.

De pai ist austònnen ont benn as de hòt verstònnen bos as ist passiert hòt se u'pfònk za rearn. De hòt kontart en de vlaig as de pain sai' nèt schea' tsechen bavai de nemmen an schouber nèkter van plea'mbler ont bavai de glaichen no en de bèspn as tea' stopfen pet en sai' ongl. Alura za quatarn sa hòt s en tsòk as de vlaing aa sai' nèt gearn tsechen van lait bavai de zurmen za vil ont asou skitzn se sa.

Derbail as de sai' noch gaben za klòffen, ist verpai a bèsp as, za hearn de stimm van zboa vicher drinn en ploa'm, ist se schubet sem gòngen za hèlven sa. Pet de sai' gònze kroft hòt se augatu' der ploa'm ont va sem sai' se araus kemmen de pai ont de vlaig runt mia ont derschrocken. De sai' drinn gaben garift en an naransvòrbegen ausònderer òcks.

De bèsp ist sem glaim gòngen kan zboa vicher; òlla peada hom se se runt pforchten: de hom lai sklòttert. Alura hòt s en tsòk « i boas as men sogt as I pin znicht ont pfèrlech, ober s ist nèt bor, der doi ongl prauch e lai bes oa's tuat mer bea ! »

Asou de bèsp, de vlaig ont de pai sai' kemmen kamaròtn ver en gònze sai' lem.



De lait as men moa't as sai' stelz ont as pariarn tsnicht, sai' de sèlln
as laichter hèlven en lem. Nèt òlls sèll as pariart schea' ausbende ist
schea' innbende aa.

Lisnt nia òlls sèll as song de lait, ober tsbinnt òlbe pet en enker kopf.

De pai, de vlaig ont de bèsp sai' kemmen kamaròtn ver en gònze sai'
lem, ber hat s gamoa't?